

天津徐世昌氏撰
民國四年至六年刊本影印

大清畿輔先哲傳

名將傳
師儒傳
(二)

台灣大通書局印行

名將傳一

大清畿輔先哲傳第八

天津徐世昌撰

徐可成

徐可成懷來人性忼爽補衛庠學生明崇禎十七年三月流寇入城數謀狙擊不果清朝定鼎王師西至懷來僞官解某據城以抗可成要眾誅逆賊歸清夜縋城出見統兵親王請大兵退十里全城以獻王許之翌日可成率義勇焚賊黨縛解某馳獻軍前王壯之命射一發貫的授榆林協副總兵擢河南懷慶參將時餘賊潛以數萬騎圍懷慶旁陷河北數邑勢大熾城中僅羸卒數百不能支可成誓死守分軍民更代乘陴多樹旗幟令老幼擊鉦繫示賊以強先是賊預遣百餘人僞爲商賈者伏城中謀乘夜斬門作內應可成訶知命子起龍勒兵清街巷獲奸人悉斬之賊計沮宵遁

縱兵追擊大破之尋調駐防衛輝從剿土寇一把沙等處將校多爭利可成獨收賊所掠民間子女局廟中令親屬領回無主者擇良家子配之可成數防大郡所至卹軍厲士兵民感悅年八十二卒崇祀鄉賢

王可就

王可就字向明灤州人官山東撫標遊擊剿巨盜王進周收撫賊張正等數萬人以功陞延安府參將平逆賊謝化奇之亂陞慶陽府東協副將經畧洪承疇奏調雲貴鎮守備橋其地有諸葛洞者江中多峻石不通舟楫軍需繁重皆民丁負運之因召父老問其狀僉曰中有巨石高數丈石下有洞讖云若要此洞開除非諸葛來可就慨然力任之募石工勇慧者鑿之巨石下得一碣有丁口京邊九十分之語可就曰此吾名隱語也眾皆踴躍數旬工就上

人勒石記之以功陞杭州城守副將先是杭多滑賊專以賄通當道不肖者往往左袒賊可就與賊唐起凡戰敗之而兵備道某反咎可就可就抗爭當道前乃專任可就平賊起凡屢遣人賄說可就不出戰可就怒曰賊視我爲何如人哉於是元旦會兵圍其砦親登手刃之餘黨降起凡兵稱百萬爲杭害者幾二十年至是始平上嘉其功加榮祿大夫署都督同知賜蟒玉封三代任杭時總督被江賊劫所佩刀急召與議可就請塞沿江便路置塘戍守率兵嚴捕江賊遂平尋陞福建副總兵以都督同知署總督標下中營事陞見上親臨試射授雲南臨阮澂江等處總兵時吳三桂變作復召見賜綵緞二表裏諭令速回聞密察耿藩遂星馳踰仙霞嶺而耿藩已變密遣四僞官要於途旣至圖乘間誅之謀洩迫趨都尉府度不能免歎曰大丈夫不能爲國家除賊夫復何言舉

家號泣隨之不顧遂遇害年六十一上憫其忠賜祭葬廕二子

朱萬祺

子偉

朱萬祺字敬迓號范瞻涿州人警敏有幹畧初爲諸生猿臂善射崇禎間學使者校騎射獨稱萬祺謂二十七邑士無與匹者甲申李白成僞都尉入涿括富室金萬祺鳩義士朱光祚等殲其眾自成怒率眾來攻誓屠城萬祺多方禦會清兵南下萬祺縋城馳見豫王授本州參將賊聞大兵至退走萬祺追獲象馬無算上詔賜錦袍白鏑在任五年平土寇十餘起四境獲安順治三年上幸盧溝萬祺褰韉扈蹕賜飛魚裘冠鞞佩帶明年封鎮國將軍五年免官以陳喜代之經畧洪承疇移喜湖南以萬祺再任參將後佐治河卒於官萬祺性豪俠能急人之難工詩善書其品學尤爲時所重子偉字駿侯博學善屬文工書法不樂仕進別號煙火

神仙自爲傳以言其志人爭傳之

陳喜

周天命 李得春 張承恩

陳喜字瀛海慶雲人國初以武生授天津道標中軍遷薊屯營遊擊豫王征潼關喜爲前鋒奏凱賜戰馬白金以旌其功總兵孔希貴奏隸本營有削平巨寇功分守歸德李化鯨據河北窺河南急喜度賊必濟師上流襲我後設伏以待覷半渡水陸夾擊之賊大潰轉涿州參將經略洪承疇出師江南奏請隨征賊眾時十餘萬攻常德諸將各守汛地喜獨以僻地爲憂嚴陣待之賊果來攻以有備而遁敘功以副總兵協鎮金華海氛不靖躬擐甲胄晝夜數十戰積勞卒年四十五

周天命天津人順治初爲天津鎮標中軍副將土賊莽塞聚眾唐官屯肆擄掠天命督兵入賊巢力戰受創死事聞廕都司經歷入

名宦祠

李得春通州人順治初以副將鎮沂州恤軍愛民武備完整時西山土寇嘯起民多他徙得春平叛卒招流亡三年間四境宴寧百姓復業卒於官喪歸軍民感遺愛泣送者不絕於道

張承恩字洪字昌平人善騎射有勇略順治二年守鎮江值疆宇初平奸宄未靖承恩單騎往長蕩湖招撫宿賊誅其渠餘盡釋之八年遷福建邵武協副將會剿土寇不旬日降之治兵嚴肅有犯民間一絲一粟者聽擊鼓鳴冤所部肅然

楊捷

楊捷字元凱宣化人明死難總兵國柱姪也國柱亡賜葬保安捷爲經理其家因入籍清初歷官督標副將順治五年江西鎮將金聲桓叛捷與固山譚泰合師復潮州累進左都督充福建右路總

兵康熙元年移鎮山東適于七倡亂登萊瀕危提督兵分道進捕斬賊首境內以安十二年調鎮江南總兵十七年以少保兼太子太保擢福建全省陸路提督時海寇勢甚張漳泉屬邑幾不守提疾馳抵建寧請兵于大將軍水陸進師克惠安轉戰至洛陽橋賊踞橋北設炮城三重自固提陰遣銳兵遶出賊背大破之復敗其餘黨王一鵬紀朝佐克復江東橋萬松關十九年賊聚眾漸山獅子山立十九寨聯絡島嶼充龍滄海以壯聲援提建營高浦調八漿諸船牽制賊師連破十九寨進攻廈門悉平之調補江南提督以功世襲三等阿達哈哈番二十九年卒贈少傅賜祭葬諡敏壯崇祀賢良祠

呂八音

苗之秀

張燦

許國璧

呂八音字偕倫甯津人康熙初由武舉任懷來守備將軍拜某薦

其才隨至廣東參謀幕府粵藩謀畔閉城迫撫軍提督降八音殺門卒數十毀鑰開門縱撫軍提督出藩兵追至八音殿後力卻之護全軍過梅嶺並復吉安陞福建後鎮中軍游擊轉撫標左營游擊臺灣之平也戰金門厦門屢有功陞督標後營參將擢廣西思恩府副將遷直隸三屯營尋鎮守石匣陞山東總兵官都督同知未蒞任卒其弟九成以左都督管副總兵事鎮守湖廣衡州諸處子黃鐘以左都督管遊擊事鎮守福建同安諸處皆有聲

苗之秀字吐華武邑人由行伍起家累功陞廣東碣石衛總兵衛地濱海寇出沒不常之秀多謀畧備禦有方海疆宴然三藩變起屢立戰功擢山東提督未蒞任卒追贈驃騎將軍其部將有張燦者字在中棗強人善騎射隸之秀麾下康熙十二年隨征劉進忠復普甯揭陽諸縣奪鳳凰洲取其礮臺而還十四年隨征鄭經說

萬鎮獻城奪鮮水關取永定縣戰績卓然時之秀墮經計居漳州後以計脫歸碣石而家屬悉陷賊經脅之人海之秀日夜涕泣燦偕三十人入漳奪之歸歷升參將征三藩傷左股卒於家著有難譜一書

許國璧字元璞井陘人以武舉授山左裨將遷濟南遊擊土寇亂捕獲孫南松等七人陞參將改官山右康熙十四年吳三桂畔陝西朱龍孫崇乘機叛陷神木府谷國璧督兵圍之禽斬僞官復府谷城以功擢都督僉事管通州副總兵事卒祀鄉賢

李連

傅鵬翔

李連字楚白東明人性倜儻有大志初授梁山營把總累遷提標中營守備時鄭芝龍遺孽據閩圍泉州提督知其才委署福建右營遊擊首復惠安賊逼洛陽橋爲寨不得渡連密諸士人夜涉陳

山壩五鼓抵賊營焚其壘斬賊六百大民踵至夾攻賊船悉沈溺死者無算泉州圍解進擊江東橋賊斷橋踞河中以舟師登岸逆戰連奮擊敗之連環施礮碎其船遂克江東橋進戰下坑山追至果塘玉州等寨戰兩月以捷聞復隨提督攻破獅子山克陳州馬州灣十九寨遂復海澄初戰海澄連中礮傷股裹創力戰不少挫故卒能成功賊計窮謀內衅連員險出海澄招撫其僞官吳桂羅士珍等七百餘卒萬三千船百三十艘乃以吳桂羅士珍攻廈門諸島皆下之閩平論功陞都司僉書歷都督僉事管福建右營遊擊事尋陞左都督一拜他喇布勒哈番湖廣雨桂營參將召見賜饌授浙江嚴州府副將以病卒於官

傅鵬翔開州人武舉康熙十年授浙江紹協左營守備十三年剿閩逆多斬獲功陞平陽鎮標右營遊擊十四年屯姜家山賊潛渡

刼營敗之斬馘無算十五年攻克石塘復雲和龍泉慶元松陽諸處招撫僞參將等六十餘人兵三千餘授廣東雷州副將加提督銜告歸卒於家

白斌

李正春

白斌字聖緒滄州人幼英毅好騎射善讀兵書康熙二年武舉人十六年選授陝西鎮標守備時僞將王屏藩據漢中命守西河豐縣禦諸隘口賊攻豐急城幾陷斌乘賊不意出奇兵掩殺之城獲全復隨勇署將軍趙良棟進剿四川敗賊將張棟于白水壩西直抵成都禽僞將韓天福時僞將胡國柱屯敘城西岸斌偕守備顧龍陳英出地道潛渡襲之賊大潰遁入犍爲追敗之江壩先是斌出敘州大將軍圖海餞而壯之曰白斌吾干城也此去必滅賊捷聞圖海令人滇追逸賊斌乘勝取馬湖府路抵新鎮大戰十丈峻

黃茅崗賊走死是時斌威振南荒上罷雲南取關山路入滇關
山者入滇要隘也賊守禦嚴斌率敢死士扳索潛渡大兵繼進遂
復關山於是進瀘江渡金河剿會川無敢敵者賊平論功補西甯
鎮遊擊時康熙二十二年十月也生番西兒素寇莊浪殺參將斌
率兵至先密寺生禽之殲其黨歷九載陞山東卽墨參將遷直隸
通州副將召見乾清門特授直隸宣化鎮總兵掛鎮朔將軍印賜
甲套各一詔領所部三千人隨征噶爾丹指陳兵勢稱上旨以實
心効力褒之賜蟒服食物駝馬金盆諸珍物繼從上獵賜扁額
手卷貂鼠搭獲三十六年上西巡甯夏呢噶特各番投降斌運
米抵拖羅隆賜宴坐督臣右後以宣人爭煤窑事落職歸里卒年
六十八

李正春字茂枝遵化人幼豪俠敢任不拘細行比長有勇力好讀

兵事書善劍槩康熙二十九年噶爾丹跳梁西北上諭不論有無官職准自備鞍馬効力正春投牒兵部願從軍報可是年七月隨裕親王出古北口八月至烏闌布通遇賊奮前搏戰斬首十餘級戰良久十盪十決賊披靡王壯之授千戶凱旋補石匣營守備海陸遊擊三十四年奉旨揀直隸將弁年力精幹者二十員正春列首記名復征噶爾丹出口賊偵知正春在行間紛紛鳥獸散追至二十四台俘獲甚多次土賴地賊遠颺整旅而還正春素嫻韜鈴善擊刺敢戰爲士卒先故所向有功以征西將軍白某薦擢大名協副將嗣調山永協正春每蒞任以整營伍練士馬爲不時之備屢蒙召對賜資甚優廕一子入監弟遇春官守備君賢官總兵皆其所教者年六十二卒於官

穆廷斌

穆廷弼字符公臨榆人康熙六年武進士十四年授直隸蔚州路守備整飭營伍以敏幹稱二十一年遷四川提標遊擊二十四年疊溪大定保山後生番恃列角雙馬廟山卓沙白卜諸寨阻截哨道羣踞巴豬寨劫掠爲民害總兵高鼎檄廷弼及李鎮鼎等渡河先攻列角寨番眾悉走入寨爲死抗計廷弼進擊火其碉三十八直抵寨下三面環擊復燬碉九十餘盡殲其眾雙馬廟山諸寨俱震懾乞降官軍乃分三路進攻巴豬寨廷弼由廟山攻中路大破之圍其寨燬碉百餘逆首挖子焚死餘黨冒火而逃廷弼尾躡殲之山溝窮追至黑水江搜獲僞印劄生禽悍黨三加普諸逆三十二年九月移駐威川防守西番而牛羅寨逆番復入保山界肆掠廷弼擊禽寨首白止泰番民帖然四川巡撫噶爾圖提督吳英陝西固原提督何溥交章薦遷威茂營參將四十年轉永甯協副將

明年擢蘇松水師總兵四十四年 上南巡廷杖迎駕山東賜御書
精肄堂額皇輿表古文淵鑑諸書四十六年南巡復召見御書勤
訓練額賜之五十一年賜平定朔漠方略明年 上罷廷杖總管水
師營戰船運江南倉米十萬石貯廣東福建備振濟五十三年擢
江南提督十二月陛見賜戴孔雀翎五十四年二月調福建陸路
提督賜御書八閩邦屏額六十年臺灣奸民朱一貴爲亂廷杖督
兵駐廈門策應反側立消連平永春德化安溪三邑諸賊以勞卒
官遺疏入 上痛惜贈左都督賜祭葬如例諡清恪廷杖性謙抑
廉潔自持有古儒將風泉州民感其德爲立生祠遺疏懇其眷口
居江南 上允之字秉常仕至雲南漢水總兵

張英奇

張英奇字子干深州人年十九中康熙九年武進士殿試第一授

一等侍衛歷漕標金華洞庭九谿副協特旨擢高雷廉總兵奉詔
入覲備詢營制稱善賜金與馬其赴都時路經吳川電白兩縣士
民以積逋泣懇入告英奇允之陛見日卽上奏制下兩邑逋租盡
蠲計數萬金旣回任值信宜土寇起英奇以德撫之眾遂降以計
禽六頭堡賊首不費一鏃卒於官賜祭葬如例

劉國興

周貴

劉國興字振宇赤城人從軍入閩平古田土寇積功遷守備晉遊
擊康熙十七年海寇攻廈門國興出擊之禽其渠乘勝招安反側
撫流亡禁士卒淫掠有犯必懲紀律嚴肅民戴其德擢西安副將
三十四年從征噶爾丹有功遷廣東碭石衛總兵卒於官子世明
有父風歷官閩浙總督人謂國興能以陰陽作貽謀焉其時同屬
有周貴者字榮五懷安人康熙十年官台協副將號令嚴明弁兵